

Mga Pangkabilugan nga Regulasyon sang Platun Gerilya

Una nga Edisyon
Hunyo 2006

Pangbukas

Agud isulong ang lapnagon kag masinsin nga pagpakig-away gerilya nga nagaagum sang nagapalpad kag nagapadalom nga suportang masa, ginapauswag sang Bag-ong Hangaway sang Banwa ang platun bilang basehan nga pormasyon sang pwersa sini. Platun ang basehan nga pormasyon sa pag-organisa sang pwersa, pagplano kag pagtulunga sa sakop kag mga hilikuton, kag pagpatuman sa kumand, kontrol kag koordinasyon sang pwersa sa isa ka tipikal nga kumpanya-kadaku nga prenteng gerilya sang BHB.

Platun ang sandigan nga pormasyon nga pinakasanto para epektibo nga masakop sang kumpanya-kadaku nga pwersang gerilya ang kalaparon sang isa ka distrito nga kongresyunal samtang ginaseguro ang husto nga balanse sa konsolidasyon kag ang tanan-nga-bahin nga pag-uswag sang prente. Sa sini, malatag sa pinakamadasig nga pamaagi nga masarangan ang bastante nga kalaparon sang mamaniobrahan nga may bastante nga kadalumon sang baseng masa.

Paagi sa platun bilang sandigan nga pormasyon, maseguro nga ang tipikal nga yunit gerilya may bastante nga kadakuon kag kabaskugon para mag-inisyatiba kag magkinaugalingon sa pagpatuman sang magagmay nga taktikal nga opensiba kag epektibo nga mag-away kon nabutang sa dependensiba. Ini ang salandigan sang pagpatuman sang mga taktikal nga opensiba nga nagahatag-tum-ok sa pangkabilugan sa lapnagon nga pagbira kag pagpusa sa magagmay, maluya kag nahamulag nga mga tropa sang kaaway. Sa pagtipon naman sang mga platun sa isa ka prente ukon magkalapit nga prenteng gerilya, mahimo man ang panapanahon nga pag-igo sa reaksyonaryo nga kaaway sang masingki nga bunal sa ulo.

Sa kada prenteng gerilya nga ginapauswag, dapat madasig nga tukuron ang tatlo tubtob apat ka platun nga ang kada isa nagasakop sa isa ukon duha ka banwa ukon indi gani 20-30 ka kinaandan nga kadakuon nga baryo. Isa sa mga platun nga ini ang magatindog nga pangunahon nga yunit ukon platun nga sentro de grabidad (SDG) kag ang iban pa mangin mga sekundaryo nga yunit ukon platun nga armadong yunit pangpropaganda (SYP). Relatibo nga nakalapta ang disposisyon sang mga platung SYP samtang relatibo nga nakakonsentra ang platung SDG.

Ang mga platun sa mga prente (ang mga SYP subongman ang SDG) ang mga pwersa nga teritoryal kag ginakabig nga mga pwersa nga horisontal sang BHB. Sila ang pangunahon nga pwersa sa pagpauswag kag pagdipara sa mga sona kag baseng gerilya.

Relatibo nga nakalapta ang kinaandan nga moda sang paghulag sang platung SYP bangud mas daku ang panahon sini nga ginatalana sa hilikuton masa. Ginalatag ang pwersa sang platun nga sandig sa iskwad, may pat-ud nga kalaparon, kag pirme buhi ang linya sang komunikasyon para sa madasig nga pagtipon sang bilog nga platun kon kinahanglan. Nagakonsentrar ang platun agud maghimo sang taktikal nga opensiba, maghanas, magkonsolida kag mag-asikaso sang iban pa nga kapareho nga hilikuton.

Ang platun SDG ang pangunahon nga pwersa nga pang-away, base sang pamatnugutan, kag angklahan kag tipunan sang mga platun SYP sa prente. Agud matungdan ang hilikuton nga ini, ang SDG pinakamaayo nga natalana sa pinakamauswag nga bahin ukon baseng gerilya sang prente kag sa mas gamay nga sakop sangsa sa mga SYP. Kon ipaanggid sa mga SYP, nagatalana sila sang mas daku nga panahon sa hilikuton militar, labina sa paglunsar sang mga taktikal nga opensiba.

Sa lebel sang probinsya, subrehiyon kag rehiyon, ginatukod ang SDG nga pwersang bertikal kag platun-kadaku sa pinakagamay. Ang mga ini ang pangunahon nga pwersa nga taludtod sa tagsa nila ka sakop kag angklahan sang mga pwersa sang mga prenteng gerilya. Ang mga ini ang armas sang pamunuan sang Partido kag pamatnugutan militar para sa mga importante nga proyekto pangmilitar kag pangpulitika sa sakop. Ang mga pwersang bertikal ang pangunahon nga pwersa nga pang-away sa tagsa nila ka sakop pero ginatalana pa gihapon nila sa hilikuton masa ang mas o menos 60% sang ila nga panahon.

Ginatukod man sa lebel sang probinsya pataas ang mga platon nga panghedkwarters nga nagadipara sa seguridad, suplay, komunikasyon, hilikuton masa sa palibot sang hedkwarters, kag ibanpa nga seuportang serbisyo para sa pamunuan sang Partido kag hangaway.

Ang platon isa ka organiko nga kabilugan. Indi ini simple nga pag-ululupod sang tatlo ka iskward nga may taga ka programa kag nagakinaugalingon sa paghulag. Isa ini ka pormasyon nga may iskward nga nagaserbe nga pangunahon nga bahin (main body) kag mga iskward nga pangmaniobra (maneuver squads). Agud mapatuman ang mga hilikuton nga ini, nagagamit ini sang konsentrasyon, dispersal kag pagsaylo sang mga iskward sini.

Ang platon isa ka pwera nga pangmilitar, pangpropaganda kag pangproduksyon. Pangkabilugan nga katungdanan sini ang pagsulong sang mga hilikuton kaangot sa pagtukod sang base, armado nga pag-away kag rebolusyong agraryo.

Ang platon nagapanguna sa pagtukod sang lokal nga mga yunit sang Partido kag mga lokal nga organo sang gahum pangpulitika. Ini man ang nagatukod, nagahanas, nagapahulag kag nagadumala sa mga yunit milisya kag pangdependensa-sa-kaugalingon nga naga-amlig sa kalinong kag katawhay sa mga baryo.

Ang mga regulasyon nga ini ginapagwa sang KTKS kag Komisyon Militar bilang pangkabilugan nga pagsulundan kag ubay sa pagtukod, pagpamuno, pagpadalagan kag pagkumand sa mga platon gerilya.

Una nga Regulasyon Komposisyon sang Platon Gerilya

Reg.1.1. Ang platon gerilya ginabug-os sang tatlo tubtob apat ka iskward kag 29 tubtob 36 ka opisyal kag tinawo.

Pinagamay nga platon kon 23 tubtob 28 ang opisyal kag tinawo kag pinadaku kon 37 tubtob 40

Reg.1.2. Sa sulod sang platon, ginatalana ang isa ka iskward (sa masami ang ikaduha sa tatlo ka iskward) bilang pangunahon nga bahin (main body) kag ang iban pa nga iskward bilang mga iskward nga pangmaniobra (maneuver squads). Ang mga iskward nga pangmaniobra mahimo nga italana nga bantay sa unahan (front guard), bantay sa likuran (rear guard) ukon bantay sa plangka (flank guard) sandig sa ginapangayo sang kahimtangan kag hilikuton. Sa sini nga istruktura, mas madamo nga tinawo kag mas mabaskog nga armas ang yara sa "main body" nga amo man ang basehan sang pamunuan sang platon.

Reg.1.3. Ang kada iskward may tatlo ka tim ukon napulo ka tinawo lakip na ang ang iskward lider (IL).

Reg.1.4. Sa platon nga ginapauswag pa lang, mahimo nga kabigon nga iskward bisan ang yunit nga may 7 ka elemento lang—ang iskward lider kag 6 ka tinawo nga yara sa duha ka tim.

Reg.1.5. Ang kada tim may 3 tubtob 5 ka tinawo lakip na ang tim lider (TL) kag may indi magnubo sa 3 ka riple nga mataas ang kalibre. Ang isa ka tim pwede nga mag-angkon sang tubtob 2 ka tinawo nga wala sang riple nga mataas ang kalibre.

Reg.1.6. Ang platon lider (PL) kag pangpulitikang instruktur (PI) indi regular nga katapo sang diin man nga iskward pero mahimo nga mag-upod sa isa sa mga iskward sandig sa kinahanglanon sang hilikuton. Ang iskward lider (IL) wala man ginaisip nga regular nga katapo sang diin man nga tim bisan pirme siya nagaupod sa isa sa mga tim sang iya nga iskward. Ang tim lider kabahin sang tim.

Reg.1.7. Agud magpalareho, ang mga iskward pagatawgon sandig sa numero. Gani:

Uno ang una nga iskward,

Dos ang ikaduha nga iskward,

Tres ang ikatatlo nga iskward, at

Kwatro ang ikaapat nga iskward.

Ikaduha nga Regulasyon Pagpamuno sang Partido sa Platon Gerilya

Reg.2.1. Ang platon gerilya, pareho sang bilog nga BHB kag tanan nga iban pa nga pormasyon sini, nakapaidalom sa absoluto nga pagpamuno sang Partido. Ginapatuman sini ang mga polisiya, desisyon, atas, direktiba, plano kag misyon nga ginaatas sang mga sentral nga organo sang Partido, Komisyon Militar kag natungdan nga nagapamuno nga komite sang Partido nga nagasakop sini. Sa prenteng gerilya, nagapamuno sa tanan nga platon gerilya ang Komite sang Partido sa Prenteng Gerilya (KP-PG) kag Komite nga Tagapatuman sini (KT). Ang KP-PG ang direkta nga nagatalana sa pakat sang mga platon, lakip na ang pagkonsentrar, pagdispers kag pagsaylo sang mga ini.

Reg.2.2. Ginatukod sa sulod sang platon ang Sanga sang Partido sa Platon (SPP), nga ginalakipan sang tanan nga katapo sang Partido. Ang SPP may komite nga tagapatuman (KT) kag kalihiman nga ginabug-os sang sekretaryo kag una kag ikaduha nga pangaduha nga sekretaryo. Pagaseguruhon sang SPP ang pagpamuno sang Partido sa platon kag mga hilikuton sini.

Reg.2.3. Ginatukod ang grupo sang Partido sa kada iskwad. Mahimo man nga magtukod sang grupo sang Partido sa mga taktikal nga grupo ukon ispesyal nga yunit sang hangaway nga mahimo tukuron para sa mga ispesyal nga hilikuton sa pila ka natalana nga panahon. Ang grupo sang Partido ginabug-os sang tanan nga katapo sang Partido sa iskwad ukon yunit. Ginapamunuan ini sang sekretaryo sang grupo, katimbang ang duha ka pangaduha nga sekretaryo.

Reg.2.4. Ang KT-SPP magatindog man nga tugas sang Seksyon sang Partido sa isa ka banwa ukon katumbas nga sakop.

Reg.2.5. Ang sanga sang Partido sa platon, magluwas kon yara sa plating SDG nga temporaryo nga gintalana sa seksyon, magapaidalom sa Seksyon Komite bilang pinakamataas nga teritoryal nga komite sang Partido.

Reg.2.6. Ang SPP nagabaton sang pahayag sang kumander kag sang istap, kag sang pahayag sang pangpulitika nga instruktur (PI) kag kapulungan sang mga giya pangpulitika. Panapanahon nga ginatasa sini ang komprehensibo nga kahimtangan sa ideolohiya, pulitika kag organisasyon sang Partido kag ang kahimtangan sang platon kag mga hilikuton sini.

Ikatatlo nga Regulasyon Duhaan nga Pagpamuno sa Platon

Reg.3.1. Matapos ang mga pulong sang SPP ukon KT sini, ginapatuman ang pagpamuno sa platon kag mga hilikuton sini base sa sistema sang duhaan nga pagpamuno sa hangaway sang banwa. Ang mga katungdanan kag hilikuton militar ginapatuman sang pulong sang kumand kag sang kumander. Ang mga katungdanan kag hilikuton pangpulitika ginapatuman sang pangpulitika nga instruktur kag kapulungan sang mga giya pangpulitika. Sa lebel sang platon, ang kabilugan nga pagpatuman sang mga hilikuton pangmilitar kag pangpulitika ginakoordina kag ginadumalahan sang yunit kumand.

Reg.3.2. Ang kapulungan sang mga giyang pangpulitika ang ginapamunuan sang PI kag regular nga ginahiwat para talakayon ang kahimtangan sang hilikuton pangpulitika, aregluhon ang koordinasyon kag pagbuligay sa hilikuton, lubaron ang mga problema, kag maghanda sang pahayag sa SPP.

Saklaw sang hilikuton pangpulitika ang mga masunod:

- a. pagseguro nga ang mga polisiya, desisyon, kag plano sang Partido maabtik kag maayo nga mapalapnag sa platon kag sakop sini kag matutom nga ginapatuman;
- b. paghimo sang plano sa implementasyon kag pagdumala sa pagpatuman sang programa sa hilikuton pangpulitika;

- k. regular nga paghimo sang "3 ka tsek-ap" kag sige-sige nga pagpauswag sa kamuklatan pang-ideolohiya kag pangpulitika sang mga opisyal kag hangaway, partikular sa ila rebolusyonaryo nga ispiritu kag kahandaan nga mag-away kag magsakripisyo;
 - d. pagtukod, pag-amlig kag pagpahugot sa paghiliusa sang mga upisyal kag hangaway kag sang hangaway kag pumuluyo.
 - e. hilikuton propaganda kag iban pa nga hilikuton para bungkagon ang pwera sang kaaway;
 - g. pagpaluntad sang demokrasya sa patag sang pulitika, militar kag ekonomya;
 - h. pagtasa sa ikasarang kag pag-uswag sang kada pinuno kag hangaway, pagseguro ng nagabuligay ang kada isa nga pauswag ang kaugalingon kag lubaron ang ila mga problema pangpulitika kag personal;
 - i. paagdumala sa sa internal nga seguridad agud maamligan ang mga sekreto sang Partido kag hangaway kag pungan nga makasulod ang mga espiya kag malain nga elemento.
 - l. paghimo sang pangkatilingban nga pagpanayasad kag pag-analisa sa sahi sa lugar nga ginahulagan, padayon nga pagpadalom sini, kag maid-id nga pagsubaybay sa mga pagbag-o sa sitwasyon pangpulitika;
 - m. hilikuton propaganda kag edukasyon sa sulod sang hangaway;
 - n. pagpatuman sang hilikuton masa kag rebolusyong agraryo;
 - ng. Pagtukod sang mga organo sang gahum pangpulitika kag pagpalapad kag pagpabaskog sang pungsodnon nga nagahiliugyon nga prente;
 - o. pagrekrut sang mga bag-o nga Pulang hangaway; kag
 - p. pagpahayag sa mas mataas nga organo sang Partido bahin sa dalagan sang hilikuton pangpulitika sang sanga sang Partido kag paghimo sang mga nagakaigo nga rekomendasyon;
- Reg.3.3. Ang sekretaryo, bilang tiglawas sang Partido sa platon, ang nagatindog bilang pangpulitika nga instruktur (PI). Siya ang katapat sang Kumander ukon Platon Lider (PL) base sa sandigan nga sistema sang duhaan nga pagpamuno sa hangaway. Ang sekretaryo/PI ginatalana sang mas mataas nga komite sang Partido ukon ginapili sang SPP.
- Reg.3.4. Katungdanan sang PI kag kapulungan sang mga giya pangpulitika ang magsuporta sa pagpamuno militar sang kumander kag magpauswag sa mga pangpulitika nga rekisito agud pabakuron ang determinasyon kag paayuhon ang pagtungod sang pwera sa mga away kag iban pa nga hilikuton militar. Lakip sini ang masunod nga mga hilikuton:
- a. magsuporta sa kumander para mapabaskog ang iya nga inisyatiba sa pagpamuno militar samtang nagabantay kag aktibo nga nagaanalisa kag nagapaathag bahin sa mga implikasyon sa pulitika sang mga paghulag sang platon;
 - b. mangin maayo nga halimbawa kag magbuyok sa pwera nga magsunod sa disiplina kag mga mando kag makahas nga magtungod sa mga hilikuton militar;
 - k. maabtik nga maglubad sa mga problema nga nagasablag ukon nagapaluya sa kakahas sang pwera sa pagtungod sa mga katungdanan militar;
 - d. seguruhon nga may santo nga mga pangpulitika nga paghanda sa mga aksyon militar agud mapabakod ang determinasyon sang pwera kag maengganyo ang ila kasampon sa pag-away;
 - e. mangin halimbawa sa katutom sa paghanas militar kag sa pagpakasampon sa mga teknik kag taktika sa pagpakig-away; kag

g. mangin aktibo kag maayo nga halimbawa sa tunga sang mga away kag manguna sa pagpataas sa kakahas sang mga opisyal kag hangaway sa tunga sang pagpakig-away.

Reg.3.5. Ginaseguro sang PI nga nagapanguna ang pulitika sa tanan nga paghulag sang platun. Para mahimo ini, ginahatagan sang PI sang nagakaigo nga pagtamud ang edukasyon sa mga polisiya kag pagsulundan sang Partido kag hangaway, maabtik siya nga nagapatawag sang mga konsultasyon sang YK, kag aktibo siya nga nagahatag sang mga laygay. Kon sa iya pagtasa may yara nga mandu ang PL nga may pat-ud kag daku nga negatibo nga epekto sa pulitika, kinahanglan himuon sang PI ang tanan nga masarangan para paathagan ang PL. Kag kon indi makumbinsi ang PL, mahimo nga iatubang ang halambalanon sa sanga sang Partido (ukon KT sang sanga) kag sa mas mataas nga komite sang Partido sa pinakatemprano nga panahon nga posible para mahatagan sang nagakaigo nga pagtamud kag resolusyon.

Ikaapat nga Regulasyon Ang Pulong sang Kumand, Yunit Kumand kag Kumander

Reg.4.1. Regular hiwaton ang pulong sang kumand sang platun. Pagatalakayon sang pulong sang kumand ang mga halambalanon nga nagakinahanglan sang kontribusyon kag partisipasyon sang mga lider kag pangaduha nga lider sang mga iskward pareho sang plano sa isa ka taktikal nga opensiba, plano sa implementasyon sang isa ka aksyon ukon hilikuton, mga pagbag-o sa sitwasyon militar kag mga kaanggid sini.

Reg.4.2. Magatambong sa pulong sang kumand ang PL, mga pangaduha nga platun lider, PI kag mga lider kag pangaduha nga lider sang mga iskward.

Reg.4.3. Bangud daku nga bahin sang hilikuton sang platun amo ang hilikuton masa nga ginapatuman sa pabag-o-bag-o nga sitwasyon pulitiko-militar, masunson nga magkaupod ang pulong sang kumand kag pulong sang mga giya pangpulitika sang platun agud maseguro ang masangkad kag maid-id nga pagtalakay sa mga pangunahon nga hilikuton,

Reg.4.4. Ang yunit kumand ukon pamanugutan sa operasyon sang yunit ang organo nga nagadumala sa platun kag nagapatuman sang lain-lain nga hilikuton sini. Ginabug-os ini sang platun lider (PL), pangaduha nga platun lider kag pangpulitika nga instruktur (PI).

Reg.4.5. Sandig sa sistema sang duhaan nga pagpamuno sa hangaway, nagapanguna ang PL sa pagtalakay kag pag-areglo sang hilikuton militar samtang ang PI ang nagapanguna sa pagtalakay kag pag-areglo sang hilikuton pangpulitika. Tubtob sa masarangan, bisan sa tunga sang away, pinakamaayo kon may kolektibo nga konsultahanay ang yunit kumand para sa mas maid-id nga pag-analisa kag mas mahalong nga pagdesisyon.

Reg.4.6. Ang kumander ukon platun lider (PL) ang pangkabilugan nga pinuno militar sang platun gerilya. Siya ang pangunahon nga nagaseguro kag nagasabat sa pagpatuman sa mga katungdanan, polisiya, disiplina kag maniobra militar sang yunit. Ginaseguro niya nga pirme mataas ang kahandaan militar sang bilog nga yunit kag kada hangaway. Sa tunga sang away kag mga ipit-ipit nga hitabo, may katungdanan kag awtoridad siya nga maghimo kag magpatuman sang mga madalian nga desisyon bisan wala ginakonsulta sa iban pa nga nagapanguna nga opisyal sang platun.

Reg.4.7. Partikular nga katungdanan sang platun lider ang mga masunod:

a. hugot nga hangpon ang mga polisiya, plano kag katungdanan sang Partido, manguna sa paghimo sang mga plano nga pang-implementasyon sang mga hilikuton militar kag seguruhon nga ginapatuman sang platun ang mga katungdanan, desisyon kag plano militar;

b. maid-id nga tun-an ang sitwasyon, partikular ang sitwasyon militar – kinaiya, hulag, tikang kag taktika sang kaaway kag sang yunit gerilya – sa erya nga ginahulagan kag sa bilog nga prente, kag maghimo sang santo nga tikang, taktika kag pamaagi para maamligan ang yunit, isulong ang mga katungdanan, kag lutuson ukon paslawon ang mga pag-atake kag padihot sang kaaway.

k. magdumala sa matag-adlaw nga paghulag kag disposisyon sang platun agud mapatuman ang mga hilikuton kag magsanto sa pagbag-o-bag-o sang sitwasyon pulitiko-militar.

d. pamunuan ang platun sa mga away kag seguruhon ang husto kag epektibo nga pagmaniobra sang pwersa para mapreserba ang kaugalingon kag malutos ang kaaway;

e. pauswagon kag ipabilin ang mataas nga lebel sang disiplina militar, kasampaton sa taktika kag teknik sa pagpakig-away kadungan sang mataas nga lebel sang kahandaan nga mag-away kag magsakripisyo sang bilog nga platun kag kada opisyal kag hangaway;

g. seguruhon nga nahibal-an sang bilog nga yunit ang pangkabilugan nga sitwasyon pulitiko-militar, ang kabilugan nga plano kag paghulag sang yunit, kag mga leksyon sa mga inagihan paagi sa maayo nga pagpaluntad sang demokrasya sa matag sang militar;

h. hugot nga amligan ang seguridad sang yunit, mga rebolusyonaryo nga pwersa kag pumuluyo sa sakop nga ginahulagan batok sa pagpanghalit sang kaaway kag mga elemento nga kriminal;

i. seguruhon nga komprehensibo nga ginaasikaso ang lain-lain nga hilikuton sang platun; ginaorganisa, ginahanas kag ginapaandar ang mga istap kag mga opisyal sang istap agud epektibo nga matungdan ang madamo nga hilikuton kag mahanas ang mga opisyal sini sa pag-abaga sang responsibilidad;

l. hugot nga magkoordinar kag magbuligay sa pangpulitika nga instruktur sa pagpatuman sang lain-lain nga hilikuton sang platun, magsuporta sa iya pagdumala sa hilikuton pangpulitika kag aktwal nga magtungod sang iya papel sa mga ini kag maabtik nga resolbahon sa mga pulong sang sanga sang Partido ang mga problema kag halambalanon;

m. maghimo sang regular kag ispesyal nga mga pahayag sa Partido kag mas mataas nga kumand bahin sa sitwasyon militar, hulag kag taktika sang kaaway, kahimtangan sang yunit kag sang lugar nga ginahulagan, mga away kag iban pa nga aktibidad kag plano militar sang yunit.

Reg.4.8. Mahimo nga mag-angkon sang duha ukon tatlo ka pangaduha nga platun lider ang isa ka platun gerilya. Ginatalana ini sang mas mataas nga komite sang Partido base sa rekomendasyon sang SPP.

Reg.4.9. Kon indi makatungod ang platunlider sa iya nga responsibilidad bilang pangkabilugan nga pinuno militar sang platun, awtomatiko nga magasal-i ang una nga pangaduha nga platun lider. Ang ikaduha nga pangaduha nga platun lider ang magasal-i kon indi makatungod pareho ang platun lider kag una nga pangaduha nga platun lider.

Reg.4.10. Ang PI mahimo man nga ihilera bilang isang ka PPL nga pwede mag-uyat sang pangkabilugan nga pagpamuno sa platun kon may yara sa ipit-ipit. Matapos ang pananon nga ipit-ipit, mas maayo nga ipauyat sa iban ang responsibilidad bilang PL.

Reg.4.11. Ang pangaduha nga platun lider (PPL), magluwas sa katungdanan bilang gilayon nga pangsal-i sa platun lider, mahimo nga italana man sang SPP bilang pinuno sa paniktik kag hatagan sang PL sang mga ispesipiko nga responsibilidad bilang katimbang sa pagdumala sa bilog nga platun. Kinaandan man nga nagatindog bilang iskwad lider ang PPL.

Reg.4.12. Ang pamunun sang iskwad pagabug-uson sang iskwad lider (IL), giya pangpulitika (GP) kag pangaduha nga iskwad lider (PIL). Ang kada tim sang iskwad pagapamunuan sang isa ka tim lider (TL).

Ikalima nga Regulasyon Mga Katimbang nga Kapulungan sang Kumand sa Platun

Reg.5.1. Sa sulod sang platun paluntaron ang masunod nga kapulungan bilang katimbang sang kumand para mapahipid kag mapadasig ang mga hilikuton, kapulungan sang mga giya pangpulitika, kapulungan sang mga opisyal sa paniktik; kapulungan sang mga opisyal sa lohistika kag kapulungan sang mga medik. Bangud nga direkta kag taktikal ang angot

kag pag-ubay sang komite sa prente sa mga pwera kag hilikuton sa lebel sang seksyon kag platon, simple lang ang moda sang pagpamuno, pagplano kag operasyon sang mga seksyon kag platon kag kon amo simple kag streamlined ang istruktura sang mga platon. Indi kinahanglan ang pagtukod sang mga istap sa lebel sang platon nga hamulag pa sa istruktura sang pamunuan sang prente.

Reg.5.2. Ang opisyal nga nagapamuno sa kada kapulungan ginatalana sang SPP. Sa kabilugan, ang mga opisyal nga ini ang dapat nga:

a. makahangop sang maayo sa kaundan sang mga programa kag plano sang platon;

b. maghimo ukon manguna sa paghimo sang kinahanglanon nga plano sa pagpatuman sang mga katungdanan nga gitalana sang sanga ukon sang kumand, magdumala sa pagpatuman sini kag maabtik nga magsumitir sang regular kag ispesyal nga pahayag sa kumand kag sa sanga;

k. magtambong sa pulong sang kumand kag istap kag magsumitir diri sang kinahanglan nga pahayag kag mga rekomendasyon; kag

d. maghatag sang bastante nga kinaalam kag oryentasyon sa tanan nga mga hangaway sa kaundan sang hilikuton nga pagatungdan nila, kag maghanas sang mga hangaway nga masunod nga italana sa hilikuton pang-istap.

Reg.5.3. Ang kapulungan sang mga opisyal sa paniktik may pangkabilugan nga katungdanan nga magbulig sa kumand nga mangalap sang malahalon nga impormasyon nga mabasehan sa pagtasa sang sitwasyon militar kag paghimo sang plano sa operasyon kag paghulag sang platon.

Reg.5.3.1. Partikular nga sakop sang hilikuton paniktik ang:

a. hibal-on kag seguruhon ang katuyuan sang hilikuton paniktik sandig sa katungdanan kag plano sang Partido kag sang kumand, maghimo sang partikular nga plano sa pagpatuman sang hlikuton paniktik kag base sa pag-aprubar kag bilin sang kumand magdumala sa pagpatuman sang mga ini;

b. ipatuman ang mga patuon kag paghanas para mapataas ang kabilugan nga kinaalam kag katalom sang mga hangaway sang platon, milisya kag pumuluyo sa mga halambalanon kag pangseguridad;

k. magdumala sa pangkabilugan nga pagkuha sang mga impormasyon nga kinahanglan sang platon kag sang SPP para epektibo nga makatasa sa kahimtangan pulitiko-militar;

d. magdumala sa pagkuha sang datos-paniktik para sa operasyon pangkombat kag iban pa nga operasyon militar sang platon;

e. magdumala sa pagpadalagan sang hilikuton sa kontra-paniktik sang platon kag magbulig sa pagpadalagan sang kontra-paniktik sa ginahulagan nga lugar; dapat seguruhon sang kapulungan sang mga opisyal sa paniktik nga nagakahuman ang kinaalam sini sa lambat kag resorsa sang lainlain nga ahensya sa paniktik sang kaaway sa sakop sang ginahulagan nga lugar paagi sa paglatag sang lambat para hibal-on. Sa sini, makahimo sang santo nga plano kag tikang agud madulaan epektibidad ang paniktik sang kaaway kag mahimo siya nga "bulag kag bungol".

g. magtukod, maghanas kag magpahulag sang lamabat sa paniktik nga ginapatapuan sang mga ispisipiko nga ginhanas kag ginhatagan sang katungdanan sa paniktik halin sa kubay sang milisya, yunit pangdepensa-sa-kaugalingon, mga impluwensyado nga elemento, mga kaalyado kag iban pa nga mga abyan; seguruhon ang kamuklatan, ihibalo kag kompartmentalisasyon sang lambat; kag maghimo sang ekstra nga paghalong ang seguridad sang kada indibdwal nga yara sa lambat; kag

h. magsumitir sa kumand kag sa SPP sang regular kag ispesyal nga mga pahayag paniktik nga ginalakipan sang mga nakuha nga datos paniktik kag sang pag-analisa kag pag-ebalwar sa mga datos nga ini.

Reg.5.3.2. Bisan ginaasikaso sang kapulungan sang mga opisyal sa paniktik ang pagmonitor sa hulag kag lambat sa paniktik sang kaaway, indi na sakop sang hilikuton sini ang pagmonitor sa mga ginasuspetsahan nga impiltrador ukon pagka-imbolbar sa kaaway sang mga katapo sang Partido, lider masa ukon opisyal kag hangaway sang BHB. Ano man nga impormasyon nga kaangot sini nga makuha sang istap dapat ihatag sa PI para sa nagakaigo nga pagproseso kag padayon nga pag-imbetiga.

Reg.5.4. Ang kapulungan sang mga opisyal sa lohistika (P4) ang nagabulig sa kumand sa pagdumala sang pagpangalap, pagbadyet, alokasyon kag disposisyon, pagrekord, pagdipara kag pag-amlig sang pinansya kag lohistika. Nagabulig man ang P4 sa kumand kag sa seksyon sang Partido sa pagtuon, pagdumala kag pagpatuman sang mga proyekto para sa pagpauswag sang pangabuhian sang pumuluyo kag sang suplay sang gobyerno sang banwa sa lugar nga ginahulagan.

Reg.5.4.1. Partikular nga hilikuton sang P4 ag masunod:

a. hibal-on sang maayo ang sitwasyon kag mga plano sang Partido kag sang YK kag ang mga nagaluntad nga polisiya kag oryentasyon sa pinansya kag ekonomiya, ipartikular ang mga plano sa pagpatuman sang mga katungdanan sang istap kag matapos ang pag-aprubar sang kumand ipatuman ang mga ini.

b. hatagan prayoridad ang pag-asikaso sa produksyon kag pagpangalap sang pinansya kag lohistika sang platun agud maagum sini ang ikasangang nga suportahan ang kaugalingon kag makaamot sa pondo sang prente;

k. seguruhon nga may bastante kag napanahon nga suplay pang-ekonomiya kag lohistika ang platun sa matag-adlaw nga paghulag, sa panahon sang mga pagtilipon, mga plano kag aksyon militar kag ipit-ipit nga sitwasyon;

d. seguruhon nga nahimo ang maayo nga rekomendasyon sa badyet, maid-id nga rekord sang nakalap, nagamit kag naka-istak nga suplay kag lohistika kag napanahon nga ipahayag ini sa kumand, sanga sang Partido kag sa kabilugan sang platun;

e. seguruhon nga ginpatuman ang demokrasya sa patag sang ekonomiya, ginapahibalo kag ginapahangop sa bilog nga platun ang mga polisiya kag areglo sa ekonomiya kag pinansya sang platun, kag samtang ginasabat ang mga basehan nga kinahanglanon sang kada katapo sang platun, ginapatuman ang pagkinot, simple nga pagpangabuhin kag mabudlay nga paghimakas;

g. magbulig sa pagplano kag pagpatuman sang mga proyekto kag kampanya sa produksyon kag pang-ekonomiya sa lokalidad nga ginahulagan kag sa pag-organisa kag paghanas sang mga pinuno kag katapo sang mga komite sa ekonomiya sang mga rebolusyonaryo nga organisasyon masa kag mga istap sa pinansya kag lohistika sang mga milisya sang banwa;

h. magbulig sa pagtukod kag pagpahulag sang lambat sang serbisyong suporta sa ekonomiya sang platun; kag

i. magbulig sa kumand sa pagplano kag pagdumala sa hilikuton produksyon sang platun.

Reg.5.5. Ang kapulungan sang mga medik (P5) ang nagabulig sa kumand nga seguruhon sang maayo ang kahimtangan pang-ikaayong lawas sang bilog nga platun kag nagatungod sa pag-asikaso sa kinahanglanon medikal sang platun. Nagabulig man ang P5 sa Seksyon Komite sa pag-asikaso kag pagdumala sa kabilugan nga hilikuton pang-ikaayong lawas kag medikal sa lokalidad.

Reg.5.5.1. Partikular nga sakop sang hilikuton sang P5 ang masunod:

a. hibal-on sang maayo ang sitwasyon kag mga plano sang Partido kag sang YK kag ang mga nagaluntad nga polisiya kag oryentasyon sa hilikuton sa ikaayong lawas, ipartikular ang mga plano sa pagpatuman sang mga katungdanan kag matapos ang pag-aprubar sang kumand magdumala sa pagpatuman sini;

b. hatagan sang sandigan kag abanse nga kinaalam ang kabilugan nga katapuan sang platun bahin sa basehan nga panan-awan kag syentipiko nga pag-atubang sa hilikuton sa ikaayong lawas, hatagan sang temprano nga pagbulong ang mga balatian, kag manguna sa kabilugan nga pagpaninguha nga mapabilin nga mapagros ang kada hangaway sang platun;

k. maghatag sang rekomendasyon sa kumand kag sanga kaangot sa disposisyon sang mga balatianon nga kaupod kon indi masarangan sa yunit ang pag-atipan sa ila;

d. maghanas sang mga dugang nga medik sa sulod sang platon

e. magbulig sa: paghanas sang mga medik kag opisyal sa ikaayong lawas sa kubay sang milisya kag mga organisasyon masa; pagtukod kag pagdumala sang mga komite ukon grupo sa ikaayong lawas sa kubay sang pumuluyo sa lokalidad nga ginahulagan; pagpakig-alyansa sa mga progresibo nga elemento sa sektor sa ikaayong lawas; paglunsar sang mga kampanya ukon proyekto sa ikaayong lawas;

g. seguruhon nga ginatukod ang lambat sang suporta para sa kinahanglanon sa ikaayong lawas kag medikal sang hangaway lakip ang suporta nga serbisyo halin sa lokalidad kag mga yara sa sentrong banwa; napanahon nga naanalisa ang kabilugan nga kahimtangan kag mga problema sa ikaayong lawas sang platon kag sang lugar nga ginahulagan sang platon, kag ginasumitir ang pahayag kag rekomendasyon sa kumand kag sa sanga.

Reg.5.6. Mahimo man nga magtukod sang mga taktikal nga grupo ukon tim para sa mga ispisipiko nga misyon kaangot sang hilikuton sa ikaayong lawas nga pagadumalahan ukon pagaupdan sang P5 sandig sa ginapangayo sang kahimtangan. Masami nga ginatukod nga grupo kaangot sini amo ang grupo nga magahatag sang serbisyon medikal sa baryo, grupo nga magatukod sang isa ka klinik para temporaryo nga asikasuhon ang isa ukon pila ka pasyente, kag mga kaanggid sini.

Reg.5.7. Isa ka mayor nga hilikuton sang kumand ang paghanas. Sa lebel sa platon gerilya, ang hilikuton nga ini pagaasikasuhon sang kumand ukon pulong sang kumand kag mahimo nga indi na magtukod sang isa ka tuhay kag permanente nga istap.

Ikaanom nga Regulasyon Tilipunan sang Lokal nga Armadong Pwersa sang Pumuluyo

Reg.6.1. Ang mga platon nga yara sa hilikuton masa ang pangunahon nga pwersa sang BHB sa ila taga ka sakop nga lokalidad kag nagaserbe nga ubod kag tilipunan (rallying point) sang lokal nga mga armado nga pwersa sang pumuluyo (milisya kag yunit pangdependensa-sa-kaugalingon sa mga baryo). Ang mga platon gerilya ang nagatukod, nagahanas, nagapahulag, nagaubay kag nagatahi sa lokal nga mga armado nga pwersa sang pumuluyo.

Reg.6.2. Samtang ginatukod kag ginapauswag ang mga organisasyon masa, lokal nga sanga sang Partido, organo sang rebolusyonaryo nga gahum pangpulitika, yunit sang milisya sang pumuluyo kag pangdependensa-sa-kaugalingon sa mga baryo – labi nga nagdaku ang responsibilidad sang platon bilang pangunahon nga pwersang gerilya sa lokalidad. Kaangot sini, atubangon sang platon ang masunod nga mga hilikuton pulitiko-militar sa teritoryo:

a. subaybayan ang kabilugan nga kahimtangan pulitiko-militar sa lugar agud napanahon nga makasumitir sang mga pag-analisa kag rekomendasyon sa natungdan nga nagapamuno nga komite sang Partido, mag-abiso sa iban pa nga platon, maghatag sang nagakaigo nga ubay sa mga lokal nga pwersa kag pumuluyo, kag maghimo sang nagakaigo nga disposisyon kag mga tikang;

b. tumuron kag nyutralisahon ang lambat kag mga gaway sa pagpaniktik kag pagpanabotahe sang kaaway;

k. palaparon kag padalumon ang kahublagan nga likom, ipalapnag sa sulod sang hangaway kag sa kubay sang masa ang kampaya sa pagsekreto, kag istrikto nga ipatuman ang mga pagsulundan sa likom nga paghulag sang mga yunit gerilya;

d. pataason ang paghatag importansya kag pag-amlig sang masa sa seguridad paagi sa sige-sige nga hilikuton propaganda kag edukasyon, kag ipalapnag ang maayo nga mga inagihan kag pamaagi sang paglikom kag sa pagpamatok kag pagpaslaw sa mga pagpang-ipit, pagpamahog, pagpanglansi kag pag-imbetiga sang kaaway;

e. isulong ang mga aksyon kag operasyon militar (opensiba kag dependensa) nga kinahanghalan on kag masarangan agud mapabakod ang baseng masa, maamligan ang kaayuhan sang mga rebolusyonaryo nga pwersa kag masa, kag mapaslaw ang mga pagpanalakay kag kontrarebolusyonaryo nga padihot sang kaaway;

g. papagsikon ang pagsuporta kag partisipasyon sang mga lokal nga armado nga pwera kag masa sa mga operasyon kag hilikuton militar; kag

h. pangunahan ang pagpatuman sa mga layi sang gobyerno sang banwa kag pag-amlig sa demokratiko nga orden publiko batok sa mga kontrarebolusyonaryo kag kriminal.

Ikapito nga Regulasyon Pleksibilidad sang Platon Gerilya

Reg.7.1. Dapat magtuon kag magpakasampaton ang platon gerilya sa husto kag napanahon nga paggamit sang mga basehan nga gerilyang taktika sang konsentrasyon, dispersal, kag pagsaylo. Desaysibo nga mapabilin sini pirme ang mataas nga lebel sang inisyatiba, mobilidad kag pleksibilidad para maamligan ang kaugalingon, malutos ang mga pag-atake sang kaaway kag masulong ang mga rebolusyonaryo nga hilikuton sini.

Reg.7.2. Agud mapatuman ang pleksible nga disposisyon kag paghulag sang yunit, kinahanglan nga seguridad sang kumand ang mga masunod:

a. pangkabilugan nga plano sa dispersal kag konsentrasyon base sa nagaluntad nga sitwasyon pulitiko-militar kag sandig sa nakahilera nga mga katungdanan nga igapatuman sang platon;

b. depinido nga katuyuan, pat-ud nga kalawigon sang kada konsentrasyon kag dispersal;

k. pagseguro sa hugot nga kontrol kag angot sa pwera kag sa bastante nga mga suplay sa panahon sang konsentrasyon kag dispersal;

d. plano kag mga paghanda para sa mga ipit-ipit kag mga golpe nga pagbag-o sa sitwasyon;

e. istrikto nga sikreto nga paghulag kag paglikaw nga matumod kag mapadrungan sang kaaway ang latag, hulag, mga ruta nga alagyan, mga lugar nga ginabasehan kag mga linya sang komunikasyon kag suplay;

g. mangin mabinantayon pirme kag maabtik nga pagdesisyon kag pagsanto sa kada pagbag-o sa sitwasyon, pamatukan ang pagka-pabaya kag *pagpapatumpik-tumpik* subongman ang pagpadaso-daso;

h. mangin makahas kag matinugahon para pirme papakton, patalangan kag sorpresahon ang kaaway sa aton pag-atake subongman sa pagpamatok sa iya nga atake; kag

i. hugot nga angot kag malaparan nga pagpahulag sa masa sa pagsubaybay sa kahimtangan, pagpatuman sang mga hilikuton, paglubad sang mga problema kag pagpabilin nga bulag kag bungol ang kaaway.

Reg.7.3. Ang kinaandan nga moda sang paghulag sang platon gerilya amo ang relatibo nga dispersal bangud hilikuton masa ang nagapanguna nga hilikuton sini.

Sa dispersal, pat-udon pirme ang hugot nga kumand kag kontrol sa bilog nga platon. Likawan ang sobra kalawig nga dispersal, ang sobra nga pagkalapta sa magagmay kag sobra kalayo nga mga yunit, kag ang sobra nga alalangay nga pagkatunga-tunga sang mga yunit bangud pareho nga nagapaluya ang mga ini sa ikasarang sang platon nga mag-away kag magsanto sa mga golpyada nga pagbag-o sa kahimtangan. Ang mga masunod amo ang pagsulundan sa dispersal sang platon;

a. pirme magmentinar sang isa ka iskwad nga magserbe nga “main body” nga base kag angklahan sa pagbungkag kag pagtipon sang iban pa nga iskwad;

b. seguridad pirme sang kumander ang iya epektibo nga pagsubaybay, pagkontrol kag pagkumand sa nakalapta nga mga yunit;

k. ilimita sa kontrolado nga radyus sang pila ka kilometro ang kinaandan nga kalayuon sang pagbulag sang isa ka yunit halin sa “main body” – kinaandan nga sityo sang pareho nga baryo ukon kalapit nga baryo lang;

d. italana ang maksimum nga kalawigon sang pagbulag sang isa ka iskward sa “main body” halin sa 3 tubtob 7 ka adlaw;

e. ang mga yunit (iskward ukon mga taktikal nga yunit) nga nagabulag sa “main body” dapat may maathag nga misyon nga nagaplastar sang depinido nga katungdanan, lugar nga pagahulagan, kalawigon sang panahon kag pamaagi sang angtanay kag pagtipon sa “main body”;

g. ipabilin ang komposisyon kag pamunuan sang mga iskward kon ini ang magbulag sa “main body” kag seguruhon nga may natungdan nga pamunuan ang mga taktikal nga yunit nga nagabulag;

h. sa mga ispesyal nga kahigayunan nga kinahanglan ang mas malayo nga radyus ukon mas malawig nga panahon sang pagbulag sang isa ka bahin sang platon, seguruhon nga may maayo ini nga pamunuan kag relatibo nga mabaskog nga ikasarang nga mag-away; kag

i. kon magabulag sang isa ukon duha ka tim para sa ispisipiko nga hilikuton pareho sang paniktik, medikal, pagpakig-alyansa, pinansya, kag iban pa, seguruhon nga indi tuman nga mabuhinan ang ikasarang sa pag-away sang platon ukon sang pagabuhinan nga iskward.

Reg.7.4. Nagakonsentrar ang platon para maghimo sang pangsulod nga konsolidasyon (pulong pagtuon, pagtasa, pagsuma, pagsaway kag pagsaway-sa-kaugalingon, kag mga kaangay sini),

Reg.7.5. Dapat planuhon ang konsentrasyon sang platon agud malikawan ang sobra nga pagsunson ukon paglawig. Ang sobra kalawig ukon kasunson nga konsentrasyon nagaubos sang panahon nga mas maayo nga italana sa hilikuton masa kag ibanpa nga hilikuton. Mabug-at ini sa lohistika kag pwede nga magsungaw kag halinan sang problema sa seguridad.

Ang masunod amo ang pila ka pagkonsentrar sang platon:

a. kinahanglan may pat-ud nga katuyuan kag kalawigon ang pagtipon;

b. antes pa man ang pagtipon, ihanda na ang mga kinahanglanon para sa aktibidad nga rason sang pagtipon, pareho sang ekonomiya; bala, radyo kag iban pa nga kagamitan kon para sa aksyon militar; pahayag sang mga iskward kag mga borador kon para sa pagtasa, mga ubay kag talamdan sa pagtuon kon para sa edukasyon;

k. magpakasampaton sa pag-iskedyul nga lainlain nga tipo sang pagtilipon nga madasig nga ginatapos kag likawan ang mga pagtipon nga madamo kag halo-halo ang mga katuyuan nga indi lang masyado nga nagalawig kundi padaso-daso pa kag pahapyaw; kag

d. pilion sang maayo ang tyempo sang mga pagtilipon para mas pat-ud ang kadalag-an, imaksimisa ang paggamit sa panahon sang mga imbolbado, kag likawan tubtob sa masarangan ang mga ini kinahanglanon nga sablag kag dislokasyon sa iban nga hilikuton, halimbawa, hingalitan para sa internal nga konsolidasyon ang panahon nga masako ang masa sa pagtanom ukon pag-ani.

Reg.7.6. Sa hilikuton militar, ginagamit ang konsentrasyon sang pwersa para maglunsar sang taktikal nga opensiba nga nagatuyo nga magpusa sang maluya kag bulnerable nga tropa sang kaaway. Agud maseguro ang kadalag-an dapat magtipon sang daku kag mas mabaskog nga pwersa sangsa paga-atakehon nga pwersa sang kaaway. Mahimo ini paagi sa pagtingob sang iban pa nga platon gerilya kag mga yunit sang milisya sang banwa.

Reg.7.7. Ginagamit ang taktika sang pagsaylo para maglikaw sa sobra kabaskog nga pagpanalakay sang kaaway, ipreserbar ang pwersa kag magpwesto sa lugar nga mas paborable sa pagbira sa kaaway kag sa pagpukaw kag pagorganisa sa masa. Depende sa kadakuon kag kalawigon sang pagsalakay sang kaaway, mahimo nga temporaryo ukon malawigan, malapit ukon malayo ang pagsaylo. Ang malawigan kag malayo nga pagsaylo ang lubos nga pagbag-o sang

sakop nga ginahulagan kag ginadesisyunan sa lebel sang prente kag mas mataas pa base sa masangkad nga pag-ebalwar sa kahimtangan pulitiko-militar.

Reg.7.8. Ang pagbaya sa isa ka base ukon sonang gerilya indi padaso-daso nga ginahimo pero indi dapat magpang-alang-alang kon kinahanglan para mapreserbar ang pwersa sa atubang sang sobra kabaskog nga pag-atake sang kaaway. Sa malab-ot sang masarangan ihanda ang masa kag mga rebolusyonaryo nga pwersa nga mabilin sa mga lokalidad para amligan ang pwersa kag seguridad, magpursiger sa organisado nga paghulag, kag mentinaron ang mga alternatibo nga linya kag pamaagi sang pag-angot sa Partido kag rebolusyonaryo nga kahublagan. Kon masarangan, magbilin sang pwersa nga padayon nga magabira sa kaaway kag magamentinar sang angot kag pag-ubay sa masa.

Reg.7.9. Ang platon SDG, bilang pangunahon nga pwersa militar, pwede mas masunson nga magsaylo sang pwesto kag erya nga sakop para makaposisyon sa mga lugar nga mas bentaha sa paghimo sang mga taktikal nga opensiba
